

Saehyinx Seiznyez

童年趣事

□ Hoz Cungbliuj / 何宗柳



Seiznyez miz haujlai saehyinx, seizneix ngeix dauq, roxnyinh mizfeih raixcaix.

Geiq ndaej gou ndaej 10 bi seiz, caeuq gyoengq doengzdoh ndaw mbanj gig maij dwk lanzgiuz. Mbouj miz giuz, couh aeu vaj daeuj gienj guh giuz, ndaej hoengq couh bae dwk. Doeklaeng, dou doxyaeng ndei, youq ngoenzsinghiz ndeu bae rungh dwk fwnz dawzbae haw gai, cawx ndaej aen giuzgau dauq. Dou angq dangqmaz, baez cuengqhag, couh bae giuzcangz ndaw mbanj dwk giuz. Haemh miz ronghndwen, yawj ndaej raen, mizseiz dwk daengz gyanghwnz. Bouxlaux daeuj ndaq le cij baema ninz. Mizseiz banringz mbouj bae ninz, dwk giuz dwk daengz lumz bae hagdangz. Mizseiz ciengz giuz ndeu

dwk haujlai nanz cungj mbouj ndaej haeuj aen giuz lawz. Yienghneix, gou siengj ok aen banhfap ndeu daeuj: Diemj yieng dingh seizgan, ciengz giuz he gvidingh diemj geu yieng he. Miz aen fap neix le, dou youh ndaej dwk giuz, bae hagdangz youh mbouj daengzceiz lo. Doeklaeng, mboujlwnh aeu mbouj aeu bae hagdangz, dou cungj aeu diemj yieng daeuj suenq seizgan. Vunz lai couh geij boux sien dwk, vunz gizyawz couh ninz gwnz dieg cengj gemj cim geu yieng, mingzmingz lij ca didi, gyoengqde couh naeuz: “Daengz lo daengz lo, yieng coemh yaek liux lo, daengz dou dwk giuz lo!” Seizhaenx, dou mbouj baenz bingh gvaq.

Seiz doeg seiq nienzgaep, gou caeuq doengzdaiz cingzcek haemq

ndei. Cinz lauxsae son suyoj ban dou. Miz mbat he, Cinz lauxsae hwnj dangz sat le, couh baij cozyez hawj dou guh. De ngamq baij sat, gou caeuq doengzdaiz couh bekwngz heuh naeuz: “Guh ndaej lo!” Dou gangj sat couh gyau sawbough hwnjbae. Cinz lauxsae caeuq gyoengq doengzhag cungj gyaengj liux. De fan cozyez dou daeuj yawj, haenh naeuz: “Yo, Cunghdiz caeuq Cunghliuj caen coengmingz bw, cai daengz gou yaek baij daez lawz hawj sou guh cozyez, sien guh ndei.” Dou dingq le, ndawsim gig angq, lumj ndaej gwn dangz nei riuhehe.

Seiz youq Swsanh Cungsime Siujyoz doeg haj roek nienzgaep, mbanj dou liz hagdangz miz geij leix loh, byaijloh siuj hix aeu buenq diemj cung cij daengz. Seizhaenx, daengx

mbanj dou mbouj miz aen cung he roxnaeuz aen soujbyauj he. Vihliux bae hagdangz mbouj daengzceiz, gou youq ndaw ranz gyanghough daengj diuz saux ndeu, yawj ndit dingh seizgan, nanq ngauez saux daengz yawz wnggai bae hagdangz, daengz yawz wnggai cawj haeux, gou cungj hauh ndei. Miz haujlai baez, ndaw ban gyoengq doengzhag baez raen gou gip sawbit dwk ndaw daehsaw bae, hix ciuq gou guh. Ngamq gip sawbit ndei, aen cung hung hagdangz couh “dangh——dangh——dangh——” hongz hwnjdaej, roengzdangz lo. Gyoengqde cam gou: “Mwngz mbouj miz soujbyauj, baenzlawz rox yaek daengz roengzdangz?” Hainduj, gou mbouj guh sing, cam lai le, gou cij lwnh hawj gyoengqde nyi: “Ngoenz miz ndit, yawj gij ndit bangx ciengz daj congh vax roh roengzdaej, daengz gizlawz roengz dangz daih’it, daengz gizlawz roengz dangz daihngaih, baez yawj couh rox lo, itbuen ca mbouj geijlai.” Gyoengqde dingq le, cungj riu hwnjdaej, doiq gou naeuz: “Mwngz caen dwg gvai bw!”

Seiznyez lij miz haujlai saeh mizyinx, seizneix laux lo, nanz mbouj nanz ngeixdauq geij gienh, sij okdaej yaeh caezgya riuriu.

Dwkdomq

抛绣球

□ Vangz Veijgingh Vangz Gveicou sij Vangz Gyanghmyauz hoiz

Doenghbaez gonq, miz doiq mbauq sau ndeu, daegmbauq 23 bi, dahsau 22 bi, songde daj iq couh doxndiep doxyaez, song mbiengj gig rox doiqfueng ndawsim siengj maz, majhung le miz aiqcingz cingh, song boux cungj nyienh guhbaenz gvanbaz. Gyoengqde lwnh gij maqmuengh neix hawj bohmei nyi, roengzrengz ceng’ aeu bohmei doengzeiq. Bohmei song mbiengj cungj doengzeiq. Ginggvaq habmingh, dinghcaen, gvaqlaex le, sikhaek couh yaek doxaeu lo.

Banh laeuj doxaeu ngoenzhaenx, cingj cib geij congz vunz daeuj gwn laeuj. Daihgya gwn ngaiz, gwn laeuj, gwn noh, gwn byaek, youh caimax guhcaemz, nauhyied dangqmaz, itcig daengz gyanghwnz.

Dang lwggwizmoq haeuj rugmoq seiz, sawqmwh bongj raq rumz ndeu daeuj, daeng cungj deng rumz ci ndaep lo. Doeklaeng, miz duz iugvaiq ndeu cung haeujdaej, cigciep cung haeuj ndaw rugmoq bae, rag bawxmoq hwnj, gwed youq gwnz mbaq buet ok rog bae. Bawxmoq buekmingh cak, hoeng mbouj miz maz yungh. Lwggwizmoq caeuq bouxhek daeuj gyaep iugvaiq, hix laengz mbouj ndaej. Lwggwizmoq caeuq gyoengq beixnuengx, bouxhek doxyaeng gietdingh, riengzlaeng bae ra, itdingh aeu ciengj bawxmoq dauqma, mboujnex couh itcig ra roengzbae, ra raen cij sat. Doxyaeng ndei le, caezgya caez okdoengh.

Iugvaiq rag bawxmoq daengz gwnz bya rin liz aenmbanj miz cib lai leix, gyaeng de youq ndaw gamj byonghbya. Ndaw gamj miz aen laezrin iq ndeu, cang ndaej gig gyaunde. Iugvaiq dajsuenq youq gizneix guh rugmoq, haemhneix caeuq bawxmoq doxaeu. Hoeng, bawxmoq deng aemq daengz gizneix le cungjdwg daej, mbouj dingz roengzdaej saek di.

Lwggwizmoq, gyoengq beixnuengx caeuq bouxhek gaenlaeng ra daengz laj dinbya, dingqny miz sing dahsau daejnga’nga, rox bawxmoq couh

youq ndaw gamj byonghbya. Hoeng, goengq byarin hung neix lingqlanglang, bin mbouj hwnjbae, cijndaej comz youq laj dinbya, muenghyawj ndwi, mbouj miz banhfap. Iugvaiq iet gyaep okdaej yawjraen gyoengq vunz le riu dwk “Ha! Ha! Ha!” Lij sek: “Sou baema ba! Bawxmoq dauq mbouj ndaej lo! De haemhneix couh baenz yah gou lo, youq ndaw rug moq gou ngamq cang ndei gvaq haemh ndeu, gvaqlaeng de couh ciengxlwenx dwg yah gou lo. Ha! Ha! Ha!”

Cingq youq iugvaiq daeikiqvaevau seiz, miz dahsien he youq goengq bya doiqnaj dwk aendomq ndeu hawj bawxmoq, aendomq doek youq gwnz cueng aen laezrin, aendomq miz diuz sai he heux youq gwn rin rog cueng. Dahsau gig mbeihung, benzok rog cueng, iet song cik fwngz okdaej, yunghrengz gaem diuz sai aendomq, gyod roengz laj bya bae. Lwggwizmoq caeuq gyoengq beixnuengx, bouxhek sikhaek humx bawxmoq hwnjdaej, bauhoh de.

Iugvaiq raen bawxmoq buet deuz, heiqhwnj foegfoeg, sikhaek riengzlaeng gyaep roengz laj bya, cung haeuj ndaw vunz lai bae, yaek ciengj bawxmoq dauq. Youq seiz youqgaen neix, lwggwizmoq doq dawz aendomq dahsien dwk hawj bawxmoq haenx vut coh iugvaiq bae, aendomq fwt bienq baenz ndaek feiz ak ndeu, coemh dai iugvaiq lo.

Gyoengq beixnuengx caeuq bouxhek angq-fwngfwng humx youq henz ndang lwggwizmoq caeuq bawxmoq dauq daengz ranz.

Daengz ranz le, bouxhawj sikhaek dawz laeuj ndei caeuq byaek feih okdaej, cingj daihgya gwn siuyeh, angqhoh ciengj ndaej bawxmoq dauqma.

Caezgya cungj angqvauvau, hoeng lij roxnyinh dwglau. Dingz lai vunz nyinhnaeuz: Yienz naeuz iugvaiq ngamq daeuj ciengj bawxmoq deng coemh dai lo, hix aiq miz duz iugvaiq wng daeuj ciengj bawxmoq dem.



Daem ceiz.

Yienghneix, gwn siuyeh sat le, caezgya doxyaeng gietdingh, cawz hawj lwggwizmoq haeuj rugmoq buenx bawxmoq, caemhcai q vunz gizyawz lij youq roengzdaej, baen baenz 3 cujiq, doxlwnz fuengzre iugvaiq moq daeuj daengz. Vihliux gyagiengz rengz fuengzre, caezgya lij dawz aendomq venj youq gwnz dou, hawj iugvaiq moq daeuj daengz baez raen couh mbouj gamj haeuj ndaw ranz bae. Daihgya doxyaeng ndei le, couh guh hwnjdaej lo.

Itcig daengz ranzrongh, yawj mbouj miz maz saeh le, caezgya cij sanq baema.

Doiq mbauq sau neix baenzranz le, vunz lai nyinhnaeuz dwg baengh aendomq bang, gyoengqde cij ndaej vuenyungz. Yienghneix, caezgya couh siuq haujlai aendomq, lij dawz aendomq diuq foux angqhoh, yienghneix couh miz foux domq lo. Mbouj gijlai nanz, dahsau bae ganj hawfwen, caeuq bouxmbauq eu fwen hix daiq aendomq, genj ndei vunz hab’eiq couh dwk aendomq hawj de. Daj seizneix hwnj, gij fungsug dwk domq couh hwnghoengh hwnjdaej lo.